

1 Timote

Titire mbede ká Pol daa ha Timote

Bay ká se tul feri ká do bil mbede ni key

Ká bil mbede key na, Pol daa wára bo bil law Timote bay haɲa ni ka gedde tul mbika law be baɲguo bay gbú nzaa nzoɔ fe fére bayluri ká daa nzoɔ mbika lawri nduo k̄j. Ka hii bay haɲa nzoɔri ká i nán ri ba nzoɔ ndáka faa pol nzoɔ mbika lawri, mase nzoɔ soko pedri na, i bá nzoɔri ká bay mb̄iw ti tul-ri ya, a í maa d́aa pedke. Ka hii bay haɲa máy bari ká'a sóko ri na, i bá máyri ká simsed bari do báy kere. Fale le, Pol bo Timote faa ká bay d́aake ped be ba nzoɔ ped tusue taa Zezu Krisi.

Máa bayri ká do bil-e

Baka bay se tul nzoɔ fe fére bayluri: 1

Nzaa boko ká se tul nzoɔ ped Ngerewuru:

2-3

Fe ká Timote a d́aa: 4-6

Soko ká Pol hii ha Timote

¹ Yu-i Timote, bi Pol ká m̄i ba nzoɔ ndáy nzaaped Zezu *Krisi báy bol nzaa Ngerewuru Nzoɔ Yaaɲa naari, báy Zezu Krisi ká náa d́aari law naari te tul-e nzokdo na, m̄i daa mbede key na ² ha mù bo ká mù do munu ba vu bil-i taa tusueke bay law-a ká mù daa bo tul Zezu

Krisi*. Ndadf bay haŋa law huoke ndaw, kóko nun síe nzob ndaw, báy dɛkɛkɛ Bǎa Ngerewuru báy Ngerembay Zezu Krisi, ka sadf zinj mù.

Báka bay ká se tul nzob fe fére bayluri

³ Munu ká mǐ baa ha mǐ pola ndaw roo mí zol mí se kuɖu zadf ká Maseduwan na, mu káw bil ngerɛpuo ká Efɛz, a mú mbi nzaa ha nzob fe fére bayluri na, i daa nzaa fe fére taa goɔ goɔbkeri na ka gbɔ. ⁴ Mu baa ha ri pón nzaa nduo kɔɔna fal bayri na ndaw, kɔɔna saw kaniri báy nzi-ε lem lem na kara, ka gbɔ ndaw pi. Fekeri ku na mboŋ máy bay ba pola pola goɔ hɔy, a so pedf ká Ngerewuru daa zuo nduo naari bay haŋa nzobri ngónke ká bil mbika law na ya. ⁵ Mǎra saw báka bay key na, do bay haŋa nzob mbika lawri, i hii kɔ báy bil law ká *taŋ kadf kadf, báy kɛr bay kere ká uru saa bil wǎra law ndaw, roo báy law-ri ká i daa bo tul Ngerewuru ba tusɛ ndaw pi. ⁶ Nzob haŋeri i pɔŋ faa kere na ku, a í do bil máy bay taa goɔ goɔbkeri. ⁷ Bari na, i mbi sùo-ri ba nzob fére nzobri *bol kusol Ngerewuru, roo ɛ, bay ká i baa, mase fe ká i fere báy hɔrusuo-ri na, i ko sawke mbɔw ya.

⁸ Náa kóri ndaw, bol kusol Ngerewuru na, zadka nzob hɔɛ báy zadɛ ɛ, ba fe kere. ⁹ Fe ká náa kóri ta-taŋ ndaw ze do key: bay tul nzobri ká i daa fe báy zadɛ nzɛɖɛm na ze, Ngerewuru dáake bol kusol bayke ya, roo ɛ, bay tul nzob law mgbórɔri báy nzob tɔɔri ndaw, bay tul nzob túŋ Ngerewuru ngerɛŋri báy nzob

* 1:2 1.2 I kɔi Pedf 16.1-3.

feyari ndaw, nzoɓ ndólo Ngerewuru báy nzoɓ bíe riŋ-eri ndaw, nzoɓ ika bǎa bari mase máa bari ndaw, rɔɔ nzoɓ ika nzoɓri ndaw pi. ¹⁰ Ka daa bol kusol na do bay tul nzoɓ taka mgbáy bapibiri, báy warari ká i fere í naa zinj kɪ ndaw, nzoɓ dáb koyri ndaw, nzoɓ kúf bayri báy nzoɓ faa nasi bay bayluri ndaw, rɔɔ bay tul nzoɓri ká ped daa kaaya bari bod bod ká maa báy fe fére taa tusueke na ya ndaw pi. ¹¹ Fe fére taa tusueke ku na maa kɪ báy Bay Kere ká Ngerewuru daa zuo nduo-i ha mi ka-káake. Bayke ku na baa se tul riŋ dika Ngerewuru, bawda nzoɓ ká maa bay haŋa nzoɓri pisi ni.

Pol daa taambol ha Ngerewuru bay tul law kere be

¹² Mi daa taambol ha Zezu *Krisi ká ba Ngerembay naari ká ha mi hurusuo ha mi daake ped be. Be na, ka ko mi ba nzoɓ ká mi daa fe báy bol nzi-ε, a mbi mi ba nzoɓ ped be. ¹³ Ze ká pola lew mi ba nzoɓ bíe riŋ-ε ndaw, mí daa nun nzoɓ beri tuo síe ndaw, a mí tjiri ni ndaw hoy kara, ka ko nun síe bi a daa law kere zinj mi, bay ji le, pola na, mi daa law-i bo tul-e ya ndaw, a ferí ká mi daa na kara, mi ko ya ndaw pi. ¹⁴ Ba tusue kɪ, Ngerembay naari na daa bawda law kere zinj mi, a ha mi daake law-i bo tul-e, a ha mi law ini báy faa zuo zinj Zezu Krisi. ¹⁵⁻¹⁶ I ko, Zezu Krisi na vi tusiri key bay yaana nzoɓ feyari, a le, bi na, mi ba mbayke. Law kere ká'a daa zinj mi bi ká mi ba mbay nzoɓ feyaa na, ka daa munu bay kieke nzoɓri bawda iki law be na ta-taŋ. Be

ndaw rɔɔ, nzobri ká i kóko mĩ na, i dáake law-ri bo tul-e, a í kaw báy kumnun ká dɔ banɔɔ kpadara na. Bay ká mĩ baa key na, ba tusue bay ká maa bay haɲa nzobri riw bele i dɔa law-ri bo dɪ. ¹⁷ Ndad bay haɲa nzobri riw bele, i dɔa mbay ka bo tul Nɣerewuru be ká'a re mbay banɔɔ ndaw, a ba nzob ká'a hu-hudɔ ya ndaw, be ká nun nzob kɔ ni ya ndaw, a ba be huo-ε kɪ hɔy ze ka ba Nɣerewuru. Riɲ dika ba taa be mbiimbam báy mbiimbam banɔɔ! Amem! Ndad bay haɲa ni ka dɔ munu na kɪ.

Pol bo Timote

¹⁸⁻¹⁹ Timote, bo ká mù dɔ munu ba vu bil-i na, nzaa boko ká *nzob yaɲa bayri saa nzaa Nɣerewuru baa se tul-a pola na, bayke dɔ faa mbɔw munu ká mĩ báa ha mù key ndaw. Zadfka mù dɔ tul baykeri na ku ɛ, mù zɪɲ hɔrusuo ká dɪ. Mu kóro tusue bay ká se tul mbika law, a mú ha kér bay ká bil wɔra law-a na kara ka tán kad kad ndaw. Be ndaw rɔɔ, mù rúke ruy taa tusue na báy. Nzob haɲeri pɔɲ kér bay kere ká uru saa bil wɔra law-ri na, be ze í bɛke mbika law bari. ²⁰ Sakra nzobkeri ku na, Imene báy Alezandere i dɔ dɪ ndaw. Bari na, mĩ pɔɲ ri zuo nduo *Satan bay haɲa ri ɔɔ tɔiri Nɣerewuru na keɲ keɲ†.

2

Nzaa boko ká se tul simsed ká zad mbú kɪ

† **1:20** 1.20 Fére nzobri Bay Nɣerewuru ká báy zadɛ ya na ba tɔiri ni. Be ze ha Pol níike nzobkeri ku na ká sakra nzob mbika lawri zuo keɛ, zad ká nɣeretemndaya re mbay ká dɪ na.

¹ Titire dɛkre ɛ, mĩ baa ha nzoɔ mbika lawri bay haɲa ri daa nzaa bay kere ha Ngerewuru banɲuɔ, bay vbikake ni feri ndaw, bay kɔd ni bay tul nzoɔri ndaw, rɔɔ bay haɲa ni taambɔl bay tul nzoɔri riw bele, ² bay tul mbayri ndaw, nzoɔ rewpuori riw bele ndaw, bay haɲa bo dɛkeke ka do puo naari ha naa kawkeri bay kere, a naa daakeri mbay ka bo tul Ngerewuru bay faa simsed kere. ³ Be ze ba fe ka ndad bamba, a rii law Ngerewuru Nzoɔ Yaɲa naari na. ⁴ Be na, ka hii bay haɲa nzoɔri riw bele ziɲ pam, a hii bay haɲa ri tuu tusue bay ndaw. ⁵ I ko, tusueke ɛ, Ngerewuru na mbɔw. Nzoɔ ka do sikda be bay nzoɔri kara mbɔw ndaw; nzoɔke na ze ba Zezu *Krisi. ⁶ Be na ka mbi sɔo-ɛ ha hud a puoke mbɔl tul nzoɔri riw bele, a tinake ri saa bil koy feya. Ka daa munu bay nam ka Ngerewuru tuu na, a kɛke nzoɔri ta-taɲ mii, Ngerewuru hii bay yaɲa nzoɔri riw bele. ⁷ Sawke mini ze, Ngerewuru daa mĩ kaw ba nzoɔ ka-kaa bay be, a mi ba nzoɔ nday nzaaped be bay fere nzoɔri ka i ba Zib ya na feri riw bele ka naa daari law naari bo di ndaw, a mi fere ri tusue bay na ndaw pi. Bay ka mĩ baa key na ba sɔo bay ki bo, ba kud bay ya.

⁸ Munu zu ɛ, zadri riw bele ka i mbu ki ka di na, mĩ hii bay haɲa warari daa nzaa bay kere, i urake nduo-ri ba siya bay bil law-ri ka *taɲ kad kad taɲ law faa ndaw, taɲ rɔdi ndaw pi*. ⁹ A

* **2:8** 2.8 Ka saw Zibri na, zadka i do daa nzaa bay kere ɛ, i ura nduo-ri ba siya ndaw rɔɔ, i daake nzaa bay kere na bay.

máyri laa ɛ, mĩ hii bay haɲa ri nduo gari ká báy faake, í kũdke nun nzoɓ ya, a í ba nzoɓ fe d́aa bayluri ya ndaw. I ti b́a nzoɓ mgbaka tul v́aytay v́aytay ya, i ti nźaa fe gamari munu ká ba fe suku b́ay zawri ká nduy źiriri źiriri ká i d́aa b́ay lari lor ya ndaw, rɔɔ gariri ká larike ɲoɲ kal tul-ri ya ndaw pi. ¹⁰ Roo ɛ, ndadĩ ḿay nzoɓ na ba ped d́aa kere be. Be ze ba ped d́aa ḿayri ká i kɔ s̀o-ri ba nzoɓ h́e Ngerewuru. ¹¹ Ḿayri ká i d́o fére ri fe na, ndad bay haɲa ri káw d́ekeke í d́iɲ tul-ri ká pol nzoɓ ká d́o fére ri fe na. ¹² Ḿayri na, mĩ ha faa ha ri bay haɲa ri fére ẃarari fe ya, a í re mbay ká tul-ri ya ndaw. Roo ɛ, ndad bay haɲa ri káw d́ekeke†. ¹³ Tusueke ɛ, Ngerewuru d́aa *Adam ze pola ndaw rɔɔ a d́aa *Eν tɔɲ d́i b́ay. ¹⁴ Rɔɓay, ba Adam ze ɲeretemndaya ula ni ya, roo ɛ, ba Eν ze yaa nzaa úla ɲeretemndaya na, a ẃadke tul *bol kusol Ngerewuru. ¹⁵ A ze munu h́oy kara, ḿayri na, i mboɲ nzoɓ, a ɛ, i źiɲ pam ká luo Ngerewuru. Roo ɛ, ndad bay haɲa ri gedé tul mbika law b́ari ndaw, í hii nzoɓri ndaw, í d́o b́ay zadé nzedem ká nun Ngerewuru ndaw, a í s̀i s̀i s̀o-ri ya ndaw rɔɓ!

† **2:12** 2.12 Ká zad ni key na, Pol haa ḿayri bay haɲa ri d́aa ferri ká sakra nzoɓ mbika lawri na ya. Roo ɛ, ka hii bay haɲa ḿayri na, i re tul ẃarari ká zad mbú kɪ nzoɓ mbika lawri ya. I kɪ mbede niri ká b́aa bay se tul ped d́aa ḿayri na í kɔ: Ped 18.26; 1 Kɔ 11.5; Tit 2.3-4. ‡ **2:15** 2.15 Ká zad ni key na, Pol tun fe fére bayluri ká b́aa mii yaɲa kɪ ba fe ká ndaya ndaw, rɔɔ mboɲ nzoɓ na kara ba fe ká ndaya ndaw pi na. Pol hii bay haɲa ḿayri na d́aa fe ká d́o nun d́aa ḿayri na ndaw rɔɓ!

3

Simsed nzob ped Ngerewururi

¹ Zadka nzob hii bay ndáka faa pol nzob mbika lawri le, ba ped kere kị ze law-ε mgba dī ku. Bay ká mī baa key na, ba sùo bay. ² Nzob ndáka faa pol nzob mbika lawri na, a bá nzob ká bay ti tul-e ya, a dāa feri riw bele báy zadε. Ká'a bá nzob ká dāa law-ε bo tul máy be kị mbjw hōy taη nzáa máy kị ndaw, a ba nzob nzéke báy sùo-ε, a dō tul bal-ε kekeke ndaw, a bá nzob ká ker fe rōo a dāa ndaw, a bá nzob mgbaka varuri báy kere, rōo a maa bay fére nzobri fe ndaw pi. ³ Ka ti dāa koy him ya ndaw, a ba nzob tud bay ya ndaw, roo le, a bá nzob ká se lom ndaw, a ba nzob dāa nzobri zuo kị ndaw, a ba nzob taka kōn lari ya ndaw pi. ⁴ Nzob ndáka faa pol nzob mbika lawri na, a máa bay mgbaka saw nzob bil hul beri báy kere ndaw, rōo vi-eri hōy kara, i lāa nzi-ε í dāa vu mbom bo tul-e báy zadε ndaw, ⁵ bay jī le, zadka nzob kō faa mgbaka saw nzob bil hul beri ya na wāa, a dāa mina ndaw rōo, a kō faa ndáka faa pol nzob mbika lawri na le woo? ⁶ Be na, ka ti bá nzob mbika law fie ya ndaw, bo munu ya le, a úru a hew sùo-ε dukuku dukuku hā Ngerewuru kuη bay bo tul-e munu ká'a dāake zīη ngeretemndaya na. ⁷ Be na, nzobri ká i mbi law-ri ya hōy kara, i bāa bay be báy kere. Be ndaw rōo, nzobri ti jīm ni hā sahoy mgba ni hā ni tāake ndaw ngeretemndaya ya.

⁸ Do faa mbjw munu ndaw, nzob sōkō ped Ngerewururi na kara, i bá nzobri ká bay ti dōko

tul-ri ya, a í d̄aa fe báy zad̄ε. I bá nzoḅ nzaa rúo ḅayri ya nd̄aw, i d̄aa koy him ya nd̄aw, r̄oo í ḅa nzoḅ fe d̄aa r̄oḁ r̄oḁri ya nd̄aw pi. ⁹ I bá nzoḅri ká i d̄oko tul tusue ḅayri ká se tul feri ká náa d̄áari law naari ḅo d̄i, báy k̄er ḅay ká *taṅ kad̄ kad̄ ká uru saa ḅil w̄ara law-ri. ¹⁰ Nzoḅkeri ku na, ì b̄ékle ri pola ta-taṅ í k̄o nd̄aw r̄oo, zad̄ka ḅay ti tul-ri ya ε, ḅe r̄oo ì d̄aa ped̄ke na ka zúo nduo-ri báy. ¹¹ Bari nzoḅ s̄oko ped̄ Ngerewururi ká i ḅa máyri na kara*, i máa ḅay haṅa nzoḅri d̄aa vu mbom ḅo tul-ri nd̄aw, í ḅa máy r̄aṅa r̄amri ya nd̄aw, í ḅa nzoḅ nz̄éke báy s̄u-ri, a í d̄o tul ḅal-ri ká tul feri riw bele nd̄aw pi. ¹² Nzoḅ s̄oko ped̄ Ngerewururi na, i bá nzoḅri ká i d̄aa law-ri ḅo tul máy ḅari k̄i hoy taṅ nz̄aa máy k̄i nd̄aw, í maa ḅay mgbaka s̄aw vu ḅari báy nzoḅ ḅil hul ḅari báy kere nd̄aw pi. ¹³ Nzoḅ s̄oko ped̄ Ngerewururi ká i d̄aa ped̄ ḅari báy faake na, nzoḅri d̄aa mbay ḅo tul-ri nd̄aw, a mbika law ká ḅa náa z̄oḅkeri ziṅ Zezu *Krisi na, i ḅaa ḅayke báy nun w̄ara nzoḅ taṅ law t̄ók̄oke nd̄aw pi.

Krisi ḅa s̄aw mbika law naari

¹⁴ Bi na, m̄i d̄aa mbede key na ḅa mù, a mí ker mii nd̄ji ε, m̄i séke v̄aw ḅay v̄aa ziṅ mù báy. ¹⁵ A ze, zad̄ka m̄i se mí ziṅ mù vaa ya kara, mbede key na a k̄ie mù faa séke simsed̄ kere ká sakra nzoḅ mbika lawri. Bari riw bele na, i ḅa nzoḅ taa Ngerewuru Nzoḅ Káw Báy Kumnun. I d̄o munu

* **3:11** 3.11 Nzoḅ ndáy ḅay ḅaṅeri ker í ḅaa mii, máykeri ku na, i ḅa máy nzoḅ s̄oko ped̄ Ngerewururi.

ɓa tigbɔa hul ká tusue ɓay ɓar saw ká ɗi, a í ɓa
 gasay ká so tusue ɓay na. ¹⁶ I ko,
 Zezu Kri si na ví yaa sùo zinj nzoɓ;
 Tem Law Pie kie ni ɓa nzoɓ ká ɗo ɓáy zadɛ
 nzedɛm;
 Led nzaapedri ká nulue ko ni;
 Saw nzoɓri riw bele laa ɓay ɓe;
 Nzoɓri ká tusiri key ɗaa law-ri ɓo tul-e;
 Ngerewuru ha ni kaw zad káw rin ɗika.
 Be ze ɓa tusue ɓay ká ɗo zad muni ká
 Ngerewuru tina ha ni ɗo zad hie, ká náa ɗári
 law naari ɓo ɗi. Tusue ɓay key na ɓa bawda fe
 na ki!

4

¹ A roo le, Tem Law Pie ɓaa ta-tan mii, ɓro ɓie
 nam na, nzoɓ haneri i pón tusue ɓay ká se tul
 mbika law, ɓay ɗaa law-ri ɓo tul nzaa úlari
 ká temndayari ɗaa nduo bil law-ri, ɓáy fe fére
 kaayari ká uru saa luo-ri na. ² I yaɓa nzaa úla
 nzoɓ bay huori ɓáy nzoɓ kúɗ bayri ká law-ri ɗo
 tidí ká tul fe ɗaa kaaya, a í wɗruke faa kere na.
³ Bari nzoɓkeri ku na, i fere nzoɓri fe mii, yaɓa
 ki ɓa fe ká ndaya ndaw, suɓa fe haneri hoy kara
 ɓa fe ká ndaya ndaw pi. A le, Ngerewuru na ɗaa
 fe sumkeri na bay haɓa ɓo nzoɓ mbika lawri ká
 i tuu tusue ɓay tuu na, i su ɓáy faa nzaa ɓay
 kere, a í háke ni taambol. ⁴ Tusueke le, feri riw
 bele ká Ngerewuru ɗaa na ɓa fe kere, fe mbijw
 ká bay sa-saɓ na tiya. A roo le, ndaɗ bay haɓa
 ni taambol ndaw roo, í yaa ɓáy, ⁵ bay ji le, Bay

Ngerewuru, báy nzaa bay kere na, daa ha fekeri na taŋ kaɗaŋ.

Nzaa boko ka se tul fe fere báy simsed Timote

⁶ Zafka mù fere nzob mbika lawri fe nuri ku na le, mù ba tusue nzob ped Zezu *Krisi, a mú ngon ka bil tusue bay ka se tul mbika law báy fe fere kere ka mù yaa bayke báy zaɗe na. ⁷ Mu tun loko soro goɓ goɓkeri ka maa báy faa mbika law ya na ngeren, a mú daa sù-o taa tom bay doko tul Bay Ngerewuru. ⁸ Fe líe hurusuo ka ba faa ki dul na, ndaf wuo sóy ya. A roo le, nzob ka daa sù-o taa tom bay doko tul Bay Ngerewuru na, ba fe ka ndaf bamba tasiri kal feru riw bele, bay ji le, ba fe ka'a sóko ni báy káw kumnun be ka timbede ka tusiri key ndaw, roo káw báy kumnun ka'a vika vuku ndaw pi. ⁹ Be ze ba tusue bay ka maa bay haŋa nzobri riw bele yaa. ¹⁰ Be mini ze, náa daari sù naari taa tom, náa daakeri ped Ngerewuru, a náa rúkeri ruy, bay ji le, náa daari law naari nzokdo te tul Ngerewuru Nzob Káw Báy Kumnun, be ka'a ba Nzob Yaana Nzobri riw bele, roo kakalke le, ba bari ka i daa law-ri bo tul-e.

¹¹ Mu baa bay fekeri key na ha nzob mbika lawri, a mú fere ri báy zaɗe riw bele. ¹² Mu ha nzob mbiw mini kara ka siiri mù bay ba ka mù ba kuba ku ya, roo le, mu mbi sù-o ka do bod ba fe kie ki ha nzob mbika lawri, ha ri ko mù báy bay ba'a bo ndaw, simsed bo ndaw, mgbaka ini bo ndaw, daa law bo tul Ngerewuru ndaw, roo báy law-a ka *taŋ kad kad ndaw pi. ¹³ Mu mbi sù-o báy zaɗe ded, bo mú kiike bay ka do bil

mbede Ngerewuru ká nun nzobri ha ri laa ndaw, mú bo ri ndaw, rɔɔ mú fére ri bayke ndaw pi. Mu daa fekeri na munu baw ndaw rɔɔ, m̀ yi mí v̄aa zinj mù báy. ¹⁴ Fe ini ká Ngerewuru hà mù bay haɲa mù dáake ped be báy síeke ká *nzob yaɲa bayri saa nzaa Ngerewuru, ká *ngere tul pedri dáake nduo-ri bo tul-a na, mu daa laysuo ká d̄i ya. ¹⁵ Mu daa fekeri ku na báy zadε, mú mbi s̄o-ɔ d̄ed mú dáake pedke. Be ndaw rɔɔ nzobri riw bele i kókoke ngɔɲɔ bo ká mù daa ká bil ped Ngerewuru na báy. ¹⁶ Mu nze báy s̄o-ɔ bay tul simsed bo ndaw, tul fe fére bo ká mù fere nzobri ndaw pi. Mu d̄o tul bal-a ká tul fe niri key na riw bele. Zadka mù daa munu le, mù yaɲa s̄o-ɔ ndaw, rɔɔ nzobri ká i laa bay bo na kara, i yaɲake s̄o-ri ndaw pi.

5

¹ Nzob ká ngɔ-ngɔɲ ro na, kók ká mu tunj ni báy bay, roo le, mu baa bay zinj ni báy kusol huoke, bay ji le, ka d̄o munu ba b̄a-ka ro. A nzobri ká i ba kubanri le, ndad bay daa kere zinj ri munu ká mù dáake zinj bil máa bori. ² A máyri ká i ngɔ-ngɔɲ na, mu daa kere zinj ri munu ká mù dáake zinj máa-ɲari; a máy tikd̄iri laa le, mu daa kere zinj ri báy bil w̄ara law-a ká taɲ kad kad munu ká mù dáake zinj t̄inaɲ-ari.

Nzaa boko ká se tul máy síeri

³ Máy síeri ká nzob kɔ-kóm ba tul-ri tiya na, mu mgba ri báy kere. ⁴ A roo le, máy síe ká vi-eri mase vu zi-eri d̄o d̄i laa le, ndad bay haɲa ri

kóro ni báy kere í h̄́eke Ngerewuru. Ndad̄ bay haṅa ri d̄aa munu, í p̄úoke mbol fe kere ká nzoḅ mbón̄ ri d̄aa ziṅ ri na. Be ze ba fe ká rii law Ngerewuru.

⁵ M̄áy síe ká kaw huo-ε ká nzoḅ k̄o-kóm̄ ba tul-e tiya na, ka d̄aa law-ε bo tul Ngerewuru nzok̄do, a na-nam ya báy nzaa bay kere sun̄ báy bisie. ⁶ A roo le, m̄áy síe ká fe tusiri key h̄oy m̄gba law-ε na, ze ka kaw báy kumnun h̄oy kara, ka d̄o munu ba nzoḅ huḑe. ⁷ Fe niri key na, mu kíe nzoḅ mbika lawri ta-taṅ bay haṅa m̄áy síeri na, nzoḅ mb̄iw mini kara, ka d̄aa bay bo tul-ri báy faa simsed̄ bari ya. ⁸ Roo le, zad̄ka nzoḅ k̄o-kóm̄ ba tul nzoḅ ini beri ya nd̄aw, r̄o kakalke le, bil hul beri h̄oy kara ya nd̄aw na le, ka p̄oṅ tusue bay ká se tul mbika law nd̄aw, a ndaya bo bisuy pavbad̄ kal nzoḅ ká k̄o Ngerewuru ya r̄obay.

⁹ M̄áy síeri ká mù f̄aa riṅ ri bay haṅa nzoḅ mbika lawri so ri na, i bá m̄áyri ká m̄biimbam bari a kál s̄iṅ yie nd̄aw, a zad̄ka waa bari kaw báy kumnun báy na, i d̄aa law-ri bo tul-ri taṅ nzáa w̄ara k̄i nd̄aw pi. ¹⁰ Bari na, i bá m̄áyri ká nzoḅri p̄isi fe d̄aa kere bari: ì k̄o-kóm̄ ba tul vu bari báy kere nd̄aw, í m̄gba varuri báy kere nd̄aw, í d̄iṅ tul-ri ká pol nzoḅ Ngerewururi, í so nzoḅri ká i d̄o bil kók̄o seke fe nd̄aw, r̄o fe d̄aa bari riw bele kara, ba kere nd̄aw pi.

¹¹ A roo le, bari m̄áy síeri ká i ṅoṅ ya báy na, mu f̄aa riṅ ri ya, bay ji le, zad̄ka k̄on ȳaṅa w̄ara k̄i d̄aa ri báy le, ì úru í p̄oṅ ped̄ *Krisi ká i m̄bi s̄o-ri bay d̄aa na. ¹² Báy faa fe d̄aa bari

key na, nzoḅri d'áake bay bo tul-ri bay tul nzaa-ri ká i mbi ha Ngerewuru ndaw roo í pɔŋ na. ¹³ Roḅay, munu ká ped' d'áa bari tiya na, i haari báy faa hul hul, a fe ká ndaya kakalke le, i vi ba máy ráaŋa ramri ndaw, máy toko lawri ndaw, í ba máy taka tul bayri ndaw pi. ¹⁴ Saŋke mini ze, mi hii bay haŋa máy síeri ká i ŋɔŋ ya báy na, i yi í ya wara ki í mboŋ nzoḅ, a í kóro bil hul bari bay haŋa nzoḅ tul ŋɔŋi naari, i zín faa ká bay báake bay kaaya se tul naari ya. ¹⁵ Mi baa mini, bay ji le, máy síe haŋeri i pɔŋ faa kere na, a í se fal *Satan na doḅ ro. ¹⁶ Munu zu le, máy ká ba nzoḅ mbika law ká máy síeri ba nzoḅ ini be na, do nun haŋa ni ka ko-kóm ba tul-ri bo, ka pón ri ha ri ba soḅa ká tul nzoḅ mbika lawri ya. Be munu ndaw roo, nzoḅ mbika lawri na, i zín faa í so máy síeri ká i kaw hu-ri ki hoy taŋ nzoḅ soko ri na.

Nzaa boko ká se tul ŋere tul pedri

¹⁷ Ŋere tul pedri ká i nda faa pol nzoḅ mbika lawri báy kere na, kakalke le, bari ká i mbi sù-ri bo bil ped' káa bay báy fére Bay Ngerewuru na, do nun haŋa nzoḅ mbika lawri d'aa mbay bo tul-ri, a í mgbá ri nduo sidí, ¹⁸ bay ji le, i baa do bil mbede Ngerewuru mii: «Nday ká do toḅ naŋ bay haŋa paŋe ka tji na, mu siŋ nzi-ε ya*.» Roḅay, «Nzoḅ ká d'aa ped' na, ka maa bay zín lari ped' be†.» ¹⁹ Zádka nzoḅ d'aa bay bo tul ŋere tul ped' le, mu ya bayke ya. Mu giyaŋ ha nzoḅ bay nasikeri maa sidí mase say, i káw d'í ndaw roo

* **5:18** 5.18 Kjinja bol kusol ba sidíke 25.4; 1Kɔ 9.9. † **5:18** 5.18 Luk 10.7.

mú yaa bayke na báý. ²⁰ A bari ká i dfaa feyaa na, mu baa zinj ri ká nun nzoɓ mbika lawri riw bele bay haɗa h̄ɛ ka dfaa nzoɓ haɗri.

²¹ Mi koɗ mù ba tusue ká pol Ngerewuru báý Zezu *Krisi ndaw, ká pol leɗ nzaapedri ká nulue ká i ɗo báý zadɛ nzedem ndaw, bay haɗa mu dfaa vu mbom ka bo tul fe féteri key na báý zadɛ. Mu dfaa pedke na taɗ náa nun nzoɓ ndaw, taɗ ɗoko fal ɗaɗ nzoɓ fe dfaa kaaya ndaw pi. ²² Mu takra dfaa nduo-ɔ bo tul nzoɓ ha ni ka dfaake ped ká sakra nzoɓ mbika lawri ya. Roo le, mu békle nzoɓke na ka ta-taɗ ndaw roo, mú dfaa pedke na ka zúo nduo-ɛ báý. Bo munu ya le, mù rii bil fe dfaa kaaya nzoɓke na ndaw. Bo na, mu koro sùo-ɔ báý kere nzedem.

²³ Mu nzo ba mbii hoy baɗguo ya, roo le, mu nzo him ndji munu bay bil-a ká yoklo mù baɗguo na.

²⁴ Nzoɓ haɗeri na, feyaa bari ɗo zad hie gbay gbay ká nun nzoɓri ɗoɗ ndaw roo, bay mɗa tul-ri báý. A nzoɓ haɗeri laa le, fal bay ká mɗa tul-ri ɗoɗ ndaw roo, feyaa bari na taɗ ká nun nzoɓri báý. ²⁵ Do faa mbijw munu ndaw, fe dfaa kereri na kara ɗo zad hie gbay gbay ndaw, a hayri ká nun nzoɓ ko vaa ya kara, ti ɗoko zad muni baɗguo ya ndaw pi.

6

Nzaa boko ká se tul koyri

¹ Koyri riw bele ká i ba nzoɓ mbika lawri na, ndaɗ bay haɗa ri dfaa vu mbom ka bo tul baɗa gaɗ bari báý zadɛ, bay haɗa bo nzoɓ mbijw mini

kara, ka bíe rin Ngerewuru báy tusue bayri ká náa fereri na ya. ² Koyri ká bǎa gaṅ bari ba nzoḅ mbika lawri na, do nun haṅa ri pón dǎa vu mbom bo tul bǎa gaṅ bari, bay bá ká i ba yu k̄iri ká bil *Krisi na ya. Roo le, do nun haṅa ri dǎa ped bari na ka ndád mba taa pola ku rɔbay, bay ji le, bǎa gaṅ bari ká i tuu ndad̄i ped bari na, i ba nzoḅri ká i mbi law-ri ha Krisi, ká Ngerewuru ko ri ba nzoḅ nun-ε. Be ze ba fe ká mù fére ri a mú bo ri ha ri dǎa.

Bay ká se tul fe fére bayluri

³ Zadka nzoḅ ví fere fe k̄i bod ká tuṅ tusue bay Ngerembay naari Zezu *Krisi báy fe fére ká se tul mbika law naari na le, ⁴ nzoḅke ku na siika sùo fumra nun-ε gbiḅli, a ko fe ya tuk tuk. Sáy máy bay báy ṅgu s̄iw bay na dǎa ni ba bala. Fekeri na ku ze mboṅ dǎa kon fe ndaw, rɔd̄ k̄i ndaw, t̄iri k̄i ndaw, dǎa bay bo tul k̄i gɔr gɔr hoy ndaw, ⁵ rɔo ndor k̄i báy bay ká sakra nzoḅri ká k̄er bay bari do sikda ya, ká í tuu tusue bay mbǎa na. Bari na i mgba mii, h̄ie Ngerewuru na ba faa feziṅa.

⁶ Ba tusue, h̄ie Ngerewuru na ba faa bawda feziṅa, roo le, faake do bay tul nzoḅ ká dǎa suoriya bay tul fe ká do nduo-ε. ⁷ I ko, naari na, náa víri tusiri key nduo naari hoy, ze do faa mb̄iw munu ndaw, náa ti mbikari fe mb̄iw mini ndaw rɔo bay ȳiike ya. ⁸ A ze bo, zadka náa dori báy fe sum báy gari ndúo do sùo naari le, maa naari zu. ⁹ A nzoḅri ká bay feziṅa mgba law-ri kakalke na, bari k̄i ze i mbi sùo-ri bo bil fe líe law, a í tǎake ndaw ṅgeretemndaya báy faa kon feri bod bod ká ti sóko ri ya ndaw, a bíe ri ndaw na.

Kɔn fe niri key na, mbi huɗ ha ri, a duku ri ɓáy feziŋa ɓari. ¹⁰ I kɔ, taka kɔn lari na ze ɓa mára sɔw fe kaayari ká ɓoɗ ɓoɗ. Nzob haɓeri ká i ɗaa kɔn zín lari ɓamba na, i wǔruke faa mbika law na mak mak, a í mbi sùo-rì ɓo ɓil bawda kóko seke fe.

Nzaa boko ká se tul Timote kɪ sùo-ε

¹¹ A ɓo ká mù ɓa nzob Ngerewuru na, mu ɗúu ɗí ɗí ká tul feri na ku riw bele, mú ɗaa hɔrusuo-ɔ tun kɪ, mú ɗáake fe ká ɗo ɓáy zadε ndaw, mú hɛ Ngerewuru ndaw, mú ɗaa law-a ɓo tul-e ndaw, mú mgba ini ndaw, mú íki law-a ndaw, rɔɔ mú se lom ndaw pi. ¹² Mu ru-ruy taa tusue ká tul mbika law, a mú mgba káw ɓáy kumnun ká ɗo ɓanɔo na, ɓay jì le, ɓay ɓe nu ku na ze, Ngerewuru ɗíke mù, munu ká mù ɗínake tusue ɓay ká se tul mbika law na ɓáy kere ká pol ruɔ nzobri ká i ɓa nzob ɓay nasi ɓori na. ¹³ Mí kod mù ká pol Ngerewuru, nzob haɓa kumnun ha feri riw bele, ká pol Zezu *Krisi ká ɓaa nasi ɓay ɓe ɓáy kere ká pol Pɔs Pilad se tul tusue ɓay na. ¹⁴ Mí kod mù ɓay haɓa mù ɗo tul fe ká mǐ fere mù key na ɓáy zadε, a mú kóro sùo-ɔ nzedem ha ɓay kaaya mbɔw ka mgba tul-a ya kpuru maa ɓáy nam ká Ngerewuru a haɓa Ngerembay naari Zezu Krisi a yíi a vi. ¹⁵ Namke ku na, ɓa nam ká Ngerewuru kɪ ze ɗaa ɓo,

Be ká'a ɓa bawda nzob

ká maa ɓay haɓa nzobri pisi ni na,

Be huɔ-ε hɔy ka ɓa Gaɓ Tul feri riw;

Ka ɓa Mbay ká kal tul mbay haɓri riw bele;

Ka ɓa Ngerembay ká kal tul ngerembay haɓri;

16 Be huο-ε k̄i h̄oy, ka ba nzoβ hu-hud̄ ya;
 Zad k̄aw be d̄o bil zad̄ taṅa;
 Nzoβ maa bay séke d̄i ya nd̄aw;
 Nzoβ k̄o ni báy nun ya nd̄aw;
 Nzoβ maa bay k̄ók̄o ni ya nd̄aw pi.
 Riṅ d̄ika báy hurusuo ba taa be baṅguo kpad̄ara.
 Amem! Ndad̄ bay haṅa ni ka d̄o munu na k̄i.

17 Nzoβri k̄a i ba nzoβ feziṅari k̄a tusiri key na,
 mu baa ha ri s̄ii s̄uo-ri ya, a í d̄aa law-ri bo tul
 feziṅa k̄a waka ya h̄oy a bíε na ya. A roo ε, mu
 baa ha ri d̄aa law-ri te tul Nḡerewuru nzok̄d̄o, be
 k̄a'a ba nzoβ haṅa naari fe kereri wuruk wuruk
 bay haṅa bo náa d̄okeri bil suoriya na. 18 Mu
 báka ri ha ri d̄aa fe kere, í h̄a fe d̄aa kere ze
 ka ba feziṅa bari nd̄aw, í ba nzoβri k̄a law-ri d̄o
 puluk nd̄aw, í ba nzoβri k̄a i f̄oṅ fal fe haṅa bari
 ya nd̄aw pi. 19 I d̄aa munu ε, be nd̄aw r̄oo, i
 mbed̄εke feziṅa kere bari na d̄o zad̄ kere bay tul
 nam k̄a'a ví vuku, bay haṅa bo k̄aw báy kumnun
 taa tusue k̄a d̄o baṅguo na, ka ba taa bari.

20 Bo Timote k̄a m̄i k̄o mù ba nzoβ nun-i na,
 mu k̄oro fe k̄a i d̄aa zuo nduo-o na báy kere. Mu
 d̄aa nzaa-a ka nduo bil r̄od̄i ḡoβ ḡoβkeri k̄a tuṅ
 tusue bay k̄a tul mbika law na ya nd̄aw, r̄oo báy
 bay k̄a se tul k̄er bay fe k̄ók̄o nzoβ bay bayluri
 na ya nd̄aw pi. 21 Nzoβ haṅeri k̄a i d̄aa law-ri bo
 tul fe k̄ók̄ori k̄a munu ku na, i w̄uruke faa mbika
 law.

Ndad̄ bay haṅa law huoke Nḡerewuru ka s̄ad̄
 ziṅ r̄i.

Mbede sáka kuni fie
New Testament in Kuo

copyright © 2013 Wycliffe Bible Translators, Inc.

Language: (Kuo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 22 Feb 2024 from source
files dated 29 Jan 2022

1bae8b8b-6141-55e9-b352-adf7a01da5f4